



UPA 2022/159

24/3-2022

Anna Wangenheim

Arnanut nakuusertarneq angerlarsimaffinnilu nakuusertarneq pitsaliorniarlugit akiorniarlugillu

Europarådip isumaqatigiissutaanik (Istanbulimi isumaqatigiissummik) Kalaallit Nunaanni

Namminersorlutik Oqartussat akuersissuteqarnissaat pillugu Inatsisartut aalajangiiffigisassaattut siunnersuut.

(Meeqqanut, Inuuusuttunut Ilaqtariinnullu Naalakkersuisoq)

(Siullermeerneqarnera)

Uummatikkut kissaallannarpoq tuppallernarlunilu nammieq isumassarsiat piviusunngortinneqaraangasa. 2021-mi ukiaanerani katersunnermi siunnersuutigaara, Kalaallit Nunaat Istanbulimi isumaqatigiissummuit ilaassisasoq, Europarådip isumaqatigiissutaanik arnanut nakuusertarneq angerlarsimaffinnilu nakuusertarneq akiorniarlugit Kalaallit Nunaanni Namminersorlutik Oqartussat akuersissuteqarnissaannik.

Taamani attortissutigisimavara innuttaasunit maanilu Inatsisartuni suleqatinnit suliniut tapersorsorneqarnera takusinnaallugulu malugisinnaagakku. Tapersersuinermut tassunga qujavunga, tapersersuinerluuna taanna pissutaasoq, ullumikkut isumaqatigiissummuit akuersaarnissamut sulinitta aallartissinnaanera.

Tulluusimaarutigaara, arnanut nakuusertarneq angerlarsimaffinnilu nakuusertarneq annertuallaartoq, tamattaalluta akiornissaanut isumaqatigiissuteqaratta. Nakuusernerup kinguneri inuiaqatigiinni aaqqissuussaanittalu iluani annertuumik takussaavoq. Taassuma akiorniarnissaanut pisariaqarpoq, inuiaqatigiit peqatigalugit ineriartortitsineq ilorraap tungaanut saatinneqarnissaa – tamannalu ataatsimoorttariaqarparput. Taamaattumiguna pingaartikkiga, nakuusertarnerup aatsaat ataatsimoorluta qaangerniarsinnaagipput ilungersuutigalugu.

Tamannalu tunngavigalugu Naalakkersuisut allaanerulaartumik pullaveqarput. Saqqummiussamimmim imminkut pattalaassallutik nuannarinerorpasippaat nipiutuuliutigalugulu, soorlulusooq Naalakkersuisut kisimik eqqortumik iliortuusut. Tassunga assersuutaavoq siunnersuutip uuma saqqummiunnerani, tassami Naalakkersuisut nipiuumik kusanangaartumillu nassuaammata, Naalakkersuisut anguniagarilluinnarnerat nakuusernerup akiornissaa. Oqaatsit kusanartorsuit, uangali isumaqatiginngilara anguniagarilluinnarnerat Naalakkersuisuniissasoq. Uagut tamaavitta anguniagarissavarput. Innuttaasut ataasiakkat anguniagarissavaat.

Politikkikut sivisuallaamik soqutiginngittuusaarisimavugut taamaattussaannartullu isiginnissimalluta. Naalakkersuisut tassunga tunngatillugu takorluugaqarsimannngillat, aatsaat siunnersuut qaqinnejqarmat. Angerlarsimaffinni inuiaqatigiinnilu nakuuserneq appariarsimannngilaq. Taamaattumillu Naalakkersuisut oqaasiinit kusanartorsuarniit allarluinnarmik suliniummik aallartitsinissarput aallaaveqarnissaa pisariaqarpoq. Tamanna ataqtiginnermik inuiaqatigiillu piareersarnissaannik pisariaqarluni,



pinaveersaartitsineq Istandbulimilu isumaqtigiissutip akuerineqarnissaa siunertaasutut ingerlaneqassappat.

Naalakkersuisut takorluukkaminnik ersarissaasimasuuppata nakuusernerullu pinaveersaartinnissaanik ilumoorussamik kissaateqarsimasuuppata, Ukieanerani katersuunnermi Demokraatit, ukiut aaliangersimasut ingerlanerannu nakuusertarnerup uuttorneqarsinnaasumik 25 procentimik appatinneqarnissaanut pilersaarusiornissamik siunnersuutaat, akuerisimassagaluarpaat. Tamanna pituttuisimassagaluarpoq takussutissaasimasinnaagaluarlunilu akimut suleqatigiinnerup ilumoorullugu qulakkeerneranik. Akerlianik Naalakkersuisut iliuusissatut pilersaarutit, uuttorneqarsinnaanatillu sunniuteqarsinnaanngitsut ukkatarissallugit qinersimavaat. Tamanna takorluuisinnaassusaanngilaq angusaqarluarniarnermillu takutitsinani.

Akerlianik Naalakkersuisut maannakkut sulianut ilatsiinnarpallaartutut imminnullu iluarismaarpallaartutut isikkoqarput. Taamatullu Naalakkersuisut allapput, Kalaallit Nunaata isumaqtigiissummi aalajangersakkat annertuumik malikkai Ukieaneranilu katersuunnermi suliniuteqarsimasut Pinerluttulerinermi inatsisip tulluussarneratigut. Tamanna imminermini oqariartuut ajunngikkaluarpoq.

Aperisariaqarpungali, anguniagartaa ersarissoq naak? Nipituumik oqarsinnaanerpugut, anguniagarput sunaanersoq, oqaannarata, angerlarsimaffinni nakuuserneq aammalu arnanut meeqqanullu nakuuserneq akuerinagit? Naammannerpa, arnat ulluanninnaq arnanut nakuusertarnerup ukkatarineqartarnera, maannamut naligiissitaanerinnarmut eqqartuiffiusartoq ajornartorsiutit tigussaasut soorlu nakuuserneq aamma angerlarsimaffinni pinngitsaalisiarneq pinnagu? Oqarsinnaasariaqanngilagut, tarnikkut persuttaaneq aamma suliakkiutigineqarsinnaalissasoq? Pinngitsaaliilluni atoqateqartoqarsimatillugu uppernarsaateqarnissamik piumasaqaat piissagippit? Pinerluffigineqarsimasut kingunipilutsitsinerannut ikiorserneqarsinnaanerannik eqqartuussivikkut qulakkeerissasugut? Meeqqat toqqisisismasumik angerlarsimaffeqartinniarlugit nakuusersimasoq peersissagippit, eqqissiviilliortitsisut angerlarsimaffinniit peersissagigut angerlarsimaffimmilu anaanaasoq meerilik sungiusimasaanit peernagu? Nakuusernermi nakuusernissamillu sioorasaarinermermi eqqartuussisarnerup sularinerisa piaernerusumik sularineqarnissaanik qulakkeerinilluta? Inuinnaat akornanni sunniiniassasugut, suliniutinut peqqinnartunut pinaveersaartitsisunullu sunniiniarluta tassuunalu ilutigalugu nakuusernermut NAAGGAARLUTA ersarissumik politikkeqarluta?

Allarpassuarnik assersuusiorsinnaagaluarbunga, kissaatigaluarlugulu, oqallisigisap pingaarutilip annertunerusumik iliuuseqarfiginissaq qulakkeerniarlugu, siunissami meerartagut annertunerusumik nunatsinni inummiit inummut ataqqeitatigiissumik inuunissaminut ilinniarnissaat. Nakuuserneq pitsaasumik kinguneqanngisaannartoq ilinniartissallutigu.

Taamatut oqaaseqarluta siunnersuut ataatsimiititaliamut suliassanngorlugu innersuupparput paasiniarlugu ullumikkut inuaqtigiinni Istandbulimi isumaqtigiissummi immikkoortut ataasiakkaat qanoq annertutigisumik malinneqarnersut, aammalu qanoq ililluta politikkikkut taanna tunaartaralugu nakuusernerup pinaveersaartinneqarnissaanut pitsaernerusumik sinaakkusiisinnaanersugut.